

Govor zamjenika predsjedatelja Izaslanstva Parlamentarne skupštine BiH u Parlamentarnoj dimenziji SEI Jakova Galića na sastanku Parlamentarnog komiteta Parlamentarne dimenzije SEI

Sofija, 17. svibnja 2022.

Poštovani predsjednici i članovi Sobranja Republike Bugarske, Uvažene kolege poslanici, članovi parlamentarnih delegacija Centralno-evropske inicijative.

Pozdravljam vas u ime Parlamentarne skupštine Bosne i Hercegovine i delegacije PS BiH pri Parlamentarnoj dimenziji CEI-ja i zahvaljujem se našim domaćinima, bugarskoj delegaciji, koja nas je ugostila na ovom redovnom proljetnom sastanku Parlamentarnog komiteta Parlamentarne dimenzije CEI-ja.

Odmah na početku želim da dam snažnu podršku iniciranju ove teme, koja nam je u ovom turbulentnom periodu za globalne okvire, važna kao prilika da se na konstruktivniji način probamo boriti sa izazovima današnjice kroz uspostavljanje veza između nauke i napretka i industrije. Kao parlamentarci treba da nastojimo da idemo u korak sa savremenim dostignućima, na način da možemo pravovremeno da donesemo i ispratimo zakonske okvire koji bi omogućili svim istraživačima i inovatorima nesmetan rad u regionu CEI-ja, ali i šire, u svim zemljama Evropske unije. Potpuno sam saglasan da je zadatak svakog parlamenta usvajanje legislative koja će omogućiti brži, bolji i lakši protok dostignuća i znanja, kao i njihovu primjenu na tržištu kapitala.

I ovaj naš dijalog i bliska regionalna saradnja, koju negujemo i kroz Centralnoevropsku inicijativu, najbolji su način rješavanja svih otvorenih pitanja i, rekao bih, najbolja moguća priprema za članstvo svih zemalja Zapadnog Balkana u Evropskoj uniji, čemu svakako svi i dalje težimo.

Kao uvijek koji dolazi iz realnog sektora, uvjerenja sam da donosioci odluka i politika treba da služe narodu i da im omogućе da optimalizuju svoje performanse u bilo kojoj oblasti života, pa tako i nauci, tehnologiji, istraživačkom sektoru, jer je i nedavna pandemija pokazala da kada sve stane, a stalo je, onda svi pogledi budu upereni prema onima koji idu korak ispred svih, a to su naučnici i radnici i inovatori. Od njih i njihovog rada nam je zavisio i život, dok smo, recimo, čekali i na vakcinu, koja nam je značila život. Takvim kadrovima mi, koji sjedimo u institucijama vlasti, treba da služimo i oslušujemo stvarne potrebe koje iziskuje njihov rad.

O institucionalnim rezultatima Bosne i Hercegovine na polju inovacija mogu da pomemnem da je Parlamentarna skupština BiH ovih dana ratifikovala Sporazum između BiH i Evropske unije (EU) o učestvovanju BiH u programu Horizont Evrope - Okvirni program

za istraživanje i inovacije.

Kao što sigurno znate, potpisivanje Sporazuma otvara akademskoj zajednici i kompanijama iz BiH evropske fondove za istraživanje i inovacije vrijedne 95,5 milijardi evra za razdoblje 2021.- 2027. godina.

U ovom Sporazumu BiH je prihvatila i potvrdila ciljeve obnovljenog Evropskog istraživačkog prostora za izgradnju zajedničkog naučnog – tehnološkog područja, te se pridružila stvaranju jedinstvenog tržišta za istraživanje i inovacije, podsticanje i olakšavanje saradnje među univerzitetima, kao i razmjenu najboljih praksi u naučnom i istraživačkom radu. BiH se tako obavezala da će olakšati prekograničnu i međusektorsku mobilnost istraživača, da će podsticati slobodno kretanje naučnog znanja i inovacija, promovisati poštovanje akademskih sloboda i sloboda naučnog istraživanja, te da će pružiti podršku naučnom obrazovanju i komunikacionim aktivnostima.

Poštovane kolegice i kolege parlamentarci,

prema Svjetskoj organizaciji za intelektualno vlasništvo i njenom Globalnom inovacionom indeksu za prošlu godinu i oko 80 indikatora, pokazuje da je Bosna i Hercegovina u pogledu ukupne vrijednosti globalnog inovacionog indeksa na 75. mjestu.

Naša zemlja ima bolji skor u ulaganjima u inovacije od rezultata u oblasti inovacija. Bosna i Hercegovina zauzima 70. mjesto po ulaganju u inovacije, više nego 2020. i 2019. godine. Što se tiče rezultata koji su posljedica korištenja inovacija, Bosna i Hercegovina je na 80. mjestu. U odnosu na uporedive zemlje, Bosna i Hercegovina se prema globalnom inovacionom indeksu među 34 svjetske ekonomije s višim srednjim dohotkom nalazi na 22. mjestu, dok se u odnosu na ekonomije evropskih zemalja nalazi na 38. mjestu.

Ovi podaci nas opominju da sa mnogo većom ozbiljnošću i mi treba da se odnosimo spram nastojanja da kreiramo povoljno investiciono i istraživačko okruženje, što pored aktuelne političke situacije u zemlji i vještih tema koje nas razdvajaju svakog izbornog ciklusa, zapravo treba da iskoristimo kao našu priliku da nas sve u Bosni i Hercegovini ujedini za dobrobit naših naroda i bolju budućnost zemlje.

Očekujem i da će ovaj sastanak biti svojevrsan podsticaj za uspostavljanje novih formata saradnje na teme značajne za budućnost, kao i za buduću saradnju parlamenata i prekograničnu saradnju inovatora i investitora u našim državama i u cijelom regionu, zahvaljujem se na pažnji i želim dalji uspješan rad Narodnom Saboru u predsjedavanju ovom inicijativom. Hvala vam. (kraj)